

# 俄羅斯侵略中國痛史

編者 文公直

## 第一章 蒙邊地域之喪失

俄蒙協約發見。全國之視聽。曾集注於此。卒以國力不敵。竟於二年十一月五日結認許外蒙自治之中俄協約。國人痛焉。茲將歷來俄人侵略之迹。彙述於篇。想亦爲閱者所樂聞也。溯查俄自大俾得帝之世。卽有志於遠東。前清康熙三十二年。鄂羅斯察漢汗遣使來聘。康熙帝諭羣臣曰。鄂羅斯國人材頗健。但其性偏執。論理亦多膠滯。從古未通中國。距京師甚遠。然從陸路可通彼處。自嘉峪關行十一二日至哈密。自哈密行十二三日至吐魯番。吐魯番有五種部落。過吐魯番卽鄂羅斯之境。聞其國遼闊。有二萬餘里。漢時張騫曾出使西域。或卽彼處地方。明永樂雖經出塞。

彼時以爲甚遠。按其所至之地。離此亦不過千餘里。史書所載。霍去病曾出塞五千里。想或有之。今塞外尙有碑記可考。至外藩朝貢。雖屬盛事。恐傳至後世。未必不因此反生事端。總之。中國安甯。則外釁不作。故當以培養元氣爲根本要務耳。云云。所稱鄂羅斯者。卽俄羅斯也。察漢汗卽大俾得也。俄使來聘。而曰外藩朝貢。誇大之詞也。然康熙帝當滿清鼎盛之時。卽料及後世。因此生事端。林則徐之逆料俄患。不能專美於前矣。

清初。俄屬西伯利亞部民。時來侵擾邊境。當時目之爲羅刹。絕域紀畧云。有邏車國者。賜諸夷使不得貢。敵之不勝。又動大衆。勤舟師。遂擇八旗兵八十人長戍焉。邏車。卽俄羅斯也。柳邊紀畧言。船廠設于順治十八年。昂邦章京薩兒吾代造船於此。所以征俄羅斯也。吳振臣甯古塔紀畧云。余五歲時。邏車國人造反。到黑龍江諸處。搶貂皮。鋒甚銳。其國在大洋

東。相去萬里。所產多羅絨。漆器最精。人皆深眼高鼻。綠睛紅髮。其猛如虎。善放鳥槍。有名西瓜礮者。其形如西瓜。量敵營之遠近。雖數里外。必到敵營始裂。遇者必死。滿洲人皆畏之。將軍上疏求救。即奉檄凡流人隨旗下。及年逾六旬者。着一概皆役云。時康熙七年也。先是俄國人哈巴羅甫懷遠征黑龍江之壯志。於一六四九年。即清順治六年。上書於俄帝。請行翌年。抵雅克薩城。與滿洲軍相薄。遂接戰。自晡至暮。滿洲兵死者甚多。鞭馬奔竄下海。哈巴羅甫乃取雅克薩。更分百三十五人乘小舟追躡土族。此隊終夜下河。天明達酋長阿最之部落。有前一夕由雅克薩逃至之列弗加族人。知俄兵勇悍難禦。縱其燒家屋。逃走下流。俄兵復窮追之。自朝至午。及之。再戰。戮過半。俄兵傷者九名。獲家畜百十七頭。還軍雅克薩。既而哈巴羅甫留兵守雅克薩。自率衆備鉅礮二尊。及軍銃。大舉下河。十

日與滿洲兵遇。此地酋長集衆以當俄軍。自晨至昏。悉以巨礮殲之。時方嚴冬。河上冰結。不能更進。於是哈巴羅甫直遡河至黑龍江上流。設城堡。與前年所設陸地堡塞相接。其間步行可二日程。新城之旁。土地宜耕種。哈巴羅甫就所獲俘虜詢問各部落之情形。俘虜等告之曰。黑龍江之上流。有無所服從之一二酋長。料彼等決不能敵俄兵。可直降服之。惟黑龍江下流諸酋長。先雖逃走。方屯集大部落。待滿洲皇帝救兵之來也。哈巴羅甫據以報之俄國亞庫克城守。請其奏達俄帝。并將酋長所獻之物。與其他所獲轉獻於俄帝。計黑貂皮一百六十六枚。膽四十六枚。毛皮衣一領。亞庫克城守後奏俄帝云。今新得黑龍江一帶地。農功漁獵牧畜。無不適宜。足以爲俄國之殖民地。順治八年。俄國亞庫克城守送援兵於哈巴羅甫。兵皆裝軍銃。哈巴羅甫既得援兵。如虎添翼。勢益張。諸酋長降者頗

衆。此報傳至中國。大驚。急整軍旅進圍雅克薩城。哈巴羅甫迎擊。退之。發急使至亞克庫城告變。且請援兵。援兵既至。哈巴羅甫牽之下黑龍江。大示威諸土族。此行雖遠出。未得至黑龍江口而歸。俄京莫斯科得雅克薩等地酋長所獻物。及黑龍江地方征服之事蹟。自俄帝以至於市民。無不驚歎其功績之偉大。因其時滿洲皇帝封禁黑龍江等處。地方多不得通行。俄人如入無人之境。中國亦莫由而知之也。於是哈巴羅甫蒙俄帝召見。受殊遇。爲列擊地方官。別派鐵巴諾夫爲雅克薩城守。鐵巴諾夫下黑龍江。順治十一年六月六日。與滿洲大兵相會。滿兵或在馬上。或在舟中。水陸並進。大破鐵巴諾夫軍之一隊。部下大率戰死。鐵巴諾夫退至科馬爾河口。築城堡自守。翌年春。滿洲兵萬餘圍城堡。自三月十四日至四月四日。晝夜急攻。城兵死守。滿洲兵不能拔而退。翌年滿洲酋長下令攘逐